


11'or porta di Oficina di Museo ta sera p'esaki

Awe destaho publico di Watertoren San Nicolas



AWE ta un dia grandi pa San Nicolas. Pa 11'or di mainta ta tuma lugar e destaho publico pa renobacion di Watertoren San Nicolas, ruman morochu di esun di Playa.

E proyecto di renobacion di Watertoren San Nicolas a conoce diferente contratempo, entre otro cu e material, mester ta uno special. Pero tambe a bin acerca cu salpeter a causa mas daño cu a spera.

Despues di a haci un evaluacion di e gastonan extra cu esaki, mester a pidi un financiamiento adicional di Restauratie Fonds di Hulanda cu a pone e placa disponibel.

Na december ultimo un delegacion di e financiadornan hunto cu Ministerio di Cultura di Hulanda a yega Aruba y despues di mira e edificio y studia e peticion adicional, casi na final di luna a haya e aprobacion necesario.

Esaki ta nifica, segun sra. Yvonne Webb-Kock di Oficina di Museo, cu no ta bay tin mas retraso. El a agrega cu e edificionan aki ta propiedad di Monumentenfonds y ta cay bou di e plan integral di e plan BoAruba di Gabinete Mike Eman.

Ambos Watertoren ta construi

den e mesun aña, na 1939, y a keda cla cu diferencia di algun luna.

E edificio na San Nicolas ta keda practicamente pa loke ta su diseño, cu excepcion di e parti abou. Pues e no ta bay haya un compleho nobo na banda.

Te cu siman pasa tabatin solamente tres compania local cu a entrega un oferta pa bin na remarke pa haci e trabounan di renobacion.

Awe mainta 11'or e porta di sala di conferencia di Oficina di Museo ta sera, pa habri e buzón cu e ofertanan cu a drenta. Tur oferta, por ehempel, mester bin cu un carta di garantia di

banco. Esaki ta prome cos cu ta wordo controla y dje lo mira si ta cumpli cu tur e condicionnan poni den e bestek.

E proyecto ta wordo realisa dor di sr. Matthew (Plan D2) y bou guia di Oficina di Monumento. Sra. Webb-Kock a bisa cu nan ta spera cu e ofertanan ta cay den e suma cu a wordo poni disponibel. Si esaki t'e caso, ta bay cerca Monumentenfonds pa otorga e proyecto y cuminsa cu e construcion.

Renobacion di Watertoren ta tuma por lo menos 1 aña y nan ta spera di no tin contratiempo den construcion pa e caba na tempo y habri pa publico.

E edificio di 30 meter di altura ta haya un ampliacion masha chikito cu un trapi patras. E publico mes nunca lo yega te n'e top unda antes tabatin e tanki di awa cu no ta den uzo mas.

Su destinacion ta un area di exposicion p'e companianan di utilidad.